

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԷԿՈՆՈՄԻԿԱՅԻ ՆԱԽԱՐԱՐՈՒԹՅԱՆ
ՄՏԱՎՈՐ ՍԵՓԱԿԱՆՈՒԹՅԱՆ ԳՈՐԾԱԿԱԼՈՒԹՅԱՆ
ԲՈՂՈՔԱՐԿՄԱՆ ԽՈՐՀՐԴԻ
Ո Ր Ո Շ ՈՒ Մ
№ 40/08**

Քաղ. Երևան

8 դեկտեմբերի 2008.

Հայաստանի Հանրապետության Էկոնոմիկայի նախարարության մտավոր սեփականության գործակալության բողոքարկման խորհուրդը (այսուհետ՝ բողոքարկման խորհուրդ) հետևյալ կազմով՝ խորհրդի նախագահ Ա.Ֆ.Ազիզյան, անդամներ՝ Ա.Ս.Խաչիկյան, Բ.Շ. Վարդանյան, Գ.Յ.Ադամյան, Ա.Ա.Տոնիկյան և Ա.Վ.Բաբայան, քարտուղար՝ Լ.Ե.Ասցատրյան, իր 2008թ. դեկտեմբերի 8-ի նիստում (արձանագրություն № 66/8) քննարկեց SmithKline Beecham (GB) ընկերության ներկայացուցիչ ՀՀ հավատարմատար Ա.Գալոյանի 2008թ. հոկտեմբերի 6-ի դիմումը GAMBRO HOSPAL LTD (CH) ընկերության IR 672523 միջազգային գրանցմամբ DUOCART ապրանքային նշանի գրանցման գործողությունը չօգտագործման պատճառով Հայաստանի Հանրապետության տարածքում ԱԾՄԴ 05 և 10-րդ դասերի ապրանքների համար վաղաժամկետ դադարեցնելու խնդրանքով:

Դիմողի փաստարկները հետևյալն են:

Դիմողը դիմումում նշել է, որ «ԱՐԱԳ» ՍՊԸ ընկերության կողմից կատարված հետազոտությունների արդյունքում պարզվել է, որ GAMBRO HOSPAL LTD (CH) շվեյցարական ընկերության անունով գրանցված DUOCART (IR 672523) բառային ապրանքային նշանը ԱԾՄԴ 05 և 10-րդ դասերի ապրանքների համար չի օգտագործվել և չի օգտագործվում Հայաստանի Հանրապետության տարածքում: Ելնելով դրանից և առաջնորդվելով «Ապրանքային և սպասարկման նշանների, ապրանքի ծագման տեղանունների մասին» ՀՀ օրենքի (այսուհետ նաև օրենք) 22-րդ հոդվածի 4-րդ մասով, համաձայն որի «Ապրանքային նշանի գրանցման գործողությունը կարող է ցանկացած անձի դիմումի հիման վրա, բողոքարկման խորհրդի որոշմամբ, դադարեցվել վաղաժամկետ բոլոր ապրանքների, որոնց համար այն գրանցված է, կամ դրանց մի մասի նկատմամբ, եթե ապրանքային նշանի գրանցման թվականից հաշված 5 տարվա ընթացքում, կամ դիմումն ավելի ուշ ներկայացնելու դեպքում՝ դրան անմիջականորեն նախորդող 5

տարվա ընթացքում այն անընդհատորեն (ընդհանրապես) չի օգտագործվել ապրանքային նշանի սեփականատիրոջ կամ օրենքի 26 հոդվածի համաձայն՝ լիցենզային պայմանագրով այդ իրավունքն ունեցող անձի կողմից», դիմողը խնդրել է DUOCART (IR 672523) ապրանքային նշանի գրանցման գործողությունը Հայաստանի Հանրապետության տարածքում վաղաժամկետ դադարեցնել:

Բողոքարկման խորհուրդը «Հայաստանի Հանրապետության առևտրի և տնտեսական զարգացման նախարարության մտավոր սեփականության գործակալության բողոքարկման խորհուրդ բողոքների և դիմումների ներկայացման և քննարկման կարգի» 34-րդ կետի համաձայն 07.10.08թ. հետձանուցմամբ փոստային առաքմամբ տեղեկացրել է DUOCART (IR 672523) ապրանքային նշանի սեփականատեր՝ GAMBRO HOSPAL LTD (CH) ընկերությանը (Gambro Hospal LTD Dornacherstrasse 8 CH-4053 Basel, Switzerland), ինչպես նաև ROMARIN ապրանքային նշանների միջազգային գրանցումների հիմնապաշարում որպես ընկերության ներկայացուցիչ նշված դրա մտավոր սեփականության բաժնի (PRAT Annie, LEJEUNE Daniel, GAMBRO INDUSTRIES Legal and Intellectual Property Department, 61, avenue Tony Garnier F-69007 LYON, France)՝ բողոքարկման խորհրդի կողմից ՀՀ հավատարմատար Ա.Գալոյանի 2008թ. հոկտեմբերի 6-ի դիմումը քննարկման ընդունելու, նիստի անցկացման թվականի (2008թ. դեկտեմբերի 5) և վայրի մասին՝ կցելով դիմումի պատճենը:

2008թ. հոկտեմբերի 22-ին սեփականատիրոջը հասցեագրված ծանուցագիրը ետ է վերադարձել՝ տվյալ հասցեից Gambro Hospal LTD ընկերության տեղափոխվելու մասին նշումով: Իսկ սեփականատիրոջ ներկայացուցչին հասցեագրված համապատասխան փոստային ծանուցագիրը ետ չի վերադարձել և որևէ տեղեկություն չկա այն մասին, թե հասցեատիրոջ կողմից ծանուցումը ստացվել է, թե ոչ: Բողոքարկման խորհրդի 2008թ. դեկտեմբերի 8-ի նիստին սեփականատիրոջ որևէ ներկայացուցիչ չի ներկայացել, ինչպես նաև բողոքարկման խորհուրդը դիմումի վերաբերյալ որևէ գրավոր արձագանք սեփականատիրոջ ներկայացուցչից այդպես էլ չի ստացել:

Քննարկելով ներկայացված նյութերը բողոքում բերված հիմնավորումների շրջանակներում, հաշվի առնելով կոլեգիայի նիստում բողոքի ըստ էության քննարկման արդյունքները, բողոքարկման խորհուրդը հանգեց հետևյալ եզրակացության:

Օրենքի 22-րդ հոդվածի 4-րդ մասի համաձայն ապրանքային նշանի օգտագործման ապացույցները ներկայացնում է դրա սեփականատերը, տվյալ դեպքում՝

Gambro Hospal LTD (CH) ընկերությունը, որի պատշաճ ծանուցելու հնարավորությունները սպառված են, նկատի ունենալով 07.10.08թ. հետծանուցմամբ փոստային առաքմամբ ուղարկած ծանուցումները, սակայն ապրանքային նշանը ՀՀ-ում օգտագործելու վերաբերյալ որևէ փաստ, ապացույց կամ որևէ գրավոր արձագանք սեփականատիրոջից կամ նրա ներկայացուցչից այդպես էլ չի ներկայացվել, հետևապես բողոքարկման խորհուրդը գտնում է, որ սպառվել են սեփականատիրոջ՝ Gambro Hospal LTD (CH) ընկերությանը ծանուցելու իր հնարավորությունները, սակայն DUOCART (IR 672523) ապրանքային նշանը չօգտագործելու վերաբերյալ ՀՀ հավատարմատար Ա.Գալոյանի դիմումում բերված փաստարկները հերքելու հիմքեր չկան, և դիմումը ենթակա է բավարարման:

Ելնելով դրանից և ղեկավարվելով օրենքի 22-րդ հոդվածի 4-րդ մասով, իչպես նաև «Հայաստանի Հանրապետության առևտրի և տնտեսական զարգացման նախարարության մտավոր սեփականության գործակալության բողոքարկման խորհուրդ բողոքների և դիմումների ներկայացման և քննարկման կարգի» 79-րդ կետի «ա» ենթակետով բողոքարկման խորհուրդը

Ո Ր Ո Շ Ե Ց

Բավարարել SmithKline Beecham (GB) ընկերության ներկայացուցչի ՀՀ հավատարմատար Ա.Գալոյանի 2008թ. հոկտեմբերի 6-ի դիմումն ամբողջովին և Gambro Hospal LTD (CH) ընկերության ՍՊԸ-ի DUOCART (IR 672523) ապրանքային նշանի գրանցման գործողությունը վաղաժամկետ դադարեցնել Հայաստանի Հանրապետության տարածքում ԱՃՄԴ 05 և 10-րդ դասերի ապրանքների համար :

Բողոքարկման խորհրդի որոշումը կարող է օրենքով սահմանված կարգով բողոքարկվել դատարանում:

Բողոքարկման խորհրդի
Նախագահ

Ա.Ազիզյան